

կատարում է իրեն յանձնուած ծրագիրը եւ յարձակում է գործում Մուսուլմաննալի վըրայ. իսկ Սոկրատ բէկ Մէլիք-Շահնազարեանը, փոխանակ թթու Ջրի բարձունքները բըռնելու եւ լուր տալու Անդրանիկին, Վարանդայի վաչար վերցնելով իջնում է Քարին տակ գիւղը եւ բանակցութեան մէջ է մտնում քաղաքագլխի միջոցով՝ Շուշուայ թաթարների հետ :

Անցեալի պատմութիւնը նորից է կրկնուում եւ շորհիւ Մելիք-Շահնազարեանների՝ Ղարաբաղի հայ ժողովուրդը Փանախանի օրերն է ապրում :

Ազրբէյջանի կառավարութիւնը, Բագուի անգլիական հրամանատարի միջոցով աշխատում է Անդրանիկի արշաւանքը կանգնեցնել եւ այդ նրան յաջողում է :

Զօրավար Տոմսոնը (Բագուի անգլ. հրամանատարը) հեռագրում է Ղարաբաղի գինուած ուժերի հրամանատարներին եւ Գեներալ Անդրանիկին՝

«Դաշնակից պետութիւնների զօրքերը մըտել են Բագու. հրամայում եմ ամէն տեղ կըռիւնները դադարեցնել: Եթէ որեւէ մէկը չի կատարել իմ հրամանը, նա կը համարուի Անգլիայի թշնամին եւ գործ կ'ունենայ մեզ հետ: Հայերի շարժումները, բացասական ազդեցութիւն կ'ունենան հայկական դատի վրայ, որը խաղաղ կերպով լուծուած է Ներսայում»:

Անդրանիկին ուղղուած հեռագիրը, Շուշուայ թաթարները մի Հարարեցի ծերուկի միջոցով են ուղարկում Չանգեզուր. իսկ Ղարաբաղի հրամանատարներին՝ քաղաքագլխի միջոցով :

Անդրանիկը ստանում է Տոմսոնի հեռագիրը, դադարեցնում է զինուորական գործողութիւնները. բայց իր դրաւած դիրքերում պահում է իր զօրքը :

Ընդամէնը 40 վերստ էր մնում, որ Անդրանիկը Շուշի հասնէր: Այդ ճանապարհն էլ առանց կռուի պիտի անցնէր, քանի որ ամենափոստանդաւոր Մարքիզն ու խճուղու չորս կողմի դիրքերը վերցուած էին, մնում էր բարձրանալ թթու Ջուրը եւ ապա խճուղով անցնել Շուշի: Բայց դժբախտաբար անգլիացիների (Տոմսոնի) հեռագիրը արգելք է հան-

դիսանում Անդրանիկին՝ Ղարաբաղ մտնելու: Բացի այդ հեռագրից, Տոմսոնը Բագուից երկու սոյայ (մէկը անգլիացի, միւսը Փրանսացի) է ուղարկում Շուշի, որպէսզի գնան Չանգեզուր եւ Անդրանիկի յառաջխաղացումը կանգնեցնեն:

Այդ սպաները Նոյեմբեր 19-ի առաւօտեան աւթոմոբիլով գալիս են Շուշի եւ նոյն օրը ճանապարհուած են Չանգեզուր, վերցնելով իրենց հետ Գ-ին, որպէս թարգման: «Ապառառ»ի Կ. Կոմիաէն, երկտող է գրում Անդրանիկին, որ ուշադրութիւն չդարձնի անգլիական սպաների ուլտիմատումներին եւ առաջ շարժուի դէպի Շուշի: Միաժամանակ լիազօրում է Գ-ին մանրամասն զեկուցում տալու Անդրանիկին՝ Ղարաբաղի անցուղարձի մասին:

Սպաները Գ-ի հետ ճանապարհուած են Չանգեզուր: Ազրբէյջանի կառավարութիւնը և Հաջիսամլուի քրդերը, բոլոր միջոցներին դիմել էին, որպէսզի սպաները արագ Չանգեզուր հասնեն:

Սպաները մի ժամից հասնում են թթու Ջրի Ազրբէյջանի պոստերը եւ ճերմակ դրօշակը սարգած իջնում են դէպի Աւզալլար:

Աւզալլարի դիրքապահ զինուորները, ճերմակ դրօշակը հեռուից տեսնելով, անմիջապէս յայտնում են Անդրանիկին: Անդրանիկը կարգադրում է չկրակել:

Աւթոմոբիլը հասնում է հայկական դիրքերին:

Սպաները իջնում են աւթոմոբիլից եւ հարցընում են դիրքապահ զինուորներից, թէ ո՞ւր է Անդրանիկը:

Զինուորներից մէկը ուղեկցում է սպաներին, Անդրանիկի մօտ, որը այնքան էլ հեռու չէր կանգնած:

Սպաները ներկայանում են Անդրանիկին եւ Զօրավար Տոմսոնի նամակն են յանձնում:

Տոմսոնը այդ նամակով յայտնում է Անդրանիկին, որ խաղաղ ճանապարհով, հայկական հարցը Ներսայում լուծուած է. իսկ զինուորական գործողութիւնները կարող են ագրէլ եւ վատ հետեւանքներ ունենալ:

Անդրանիկի թեւերը փշրում են: Երկար մտածելուց յետոյ, սպաներին խօսք է տալիս իր կոիւնները դադարեցնել: